

## Պ Ա Ր Ս Կ Ա Հ Ա Յ Ք

ՏԱՌԵՐԻ ԳԻՒՏԻ ԵՒ ՏՊԱԳՐՈՒԹԵԱՆ  
ՅՈՒՐԵՆԵԱՆԸ ՍԱԼՄԱՍՏՈՒՄ

Սալմաս, 22 նոյեմբերի

Թէև քիչ ուշ, բայց վերջապէս Սալմաստն էլ կատարեց Մեծ յօրեկանը նոյեմբերի 21 ին:

Յօրեկանական հանդէսը տեղի ունեցաւ Հաֆթվանում, որպէս կենդրոնական գիւղում: Առաւօտեան, Սալմաստի ամեն գիւղերից, ուր դպրոցներ կան, աշակերտ-աշակերտուհիները իրենց ուսուցիչների առաջնորդութեամբ և բազմաթիւ ժողովրդի ուղեկցութեամբ՝ դրօշակներով, դհուլ-գուռնայով, երգելով ու պարելով դէպի Հաֆթվան ուղղուեցին: Առ. ժ. 11-ին Հաֆթվանի դպրոցի ընդարձակ բակը արդէն լիքն էր ահագին բազմութեամբ: Պատարագից յետոյ հոգեհանգիստ կատարեց բազում:

Հոգեհանգստին յաջորդեց հանդիսաւոր թափօրը գիւղի փողոցներով: Գիւղերից եկած «օխտ ձեռք» դհուլ-գուռնան միասին թնդացնում էր օղը և հազարաւոր բազմութիւնը, ժպտաւ խինդ երեսին ամբողջ գիւղը շրջան կատարելուց յետոյ, վերադարձաւ դպրոցի բակը, որտեղից բազմաթիւ խմբերի վերածելով ցրիւ եկաւ տները հաֆթվանցիների հիւրասիրութիւնը վայելելու:

Կարգադրիչ մասնախումբը առանձին հրաւիրագրերով կամ պատգամաւորութիւններով հրաւիրել էր ոուս ու պարսիկ բարձրաստիճան պաշտօնեաներին, կաթողիկ, բողոքական և օրթոդոքս միսիաններին, որոնցից հանդիսին ներկայանալու բարեհաճել էին՝ Դիւմանի ոուս գնդապետի կողմից կոմանդիր Ֆէոդոր Բամբէիչ և հայազգի մի սպայ, «Պորտ» ընկերութեան այստեղի ներկայացուցիչներից Մս. Փիթմըն և ուրիշ հայ քարոզիչներ: Պարսիկներից ոչ ոք ներկայ չէր, նրանց Մուհարեմի սգի պատճառով: Ի պատիւ յարգելի հիւրերի բանկետ էր պատրաստել, որին մասնակցեցին մօտ 40 անձինք: Բազմաթիւ կենացներ առաջարկեցին՝ թաղաւոր Կայսրի, ոուս զօրքի, Կաթողիկոսի և այլն:

Բանկետից յետոյ սկսեց դպրոցական հանդէսը: Ահագին ընդարձակ թատերասրահում ասեղ զցելու տեղ չկար, այնպէս որ շատերը ստիպւած եղան դրսում անկացնել: Հանդէսը կազմւած էր աւուր պատշաճի երգերից, արտասանութիւններից ու ճառասուտութիւններից, կար և նւագածութիւն: Կարգացեց հ. առաջնորդի ուղարկած յորդոր-նամակը, ուղղւած Սալմաստի հայութեան: Ժողովրդին ցրեցին կոչեր հազարաւոր օրիակներով Մեծ-Տօնի առթիւ:

Դպրոցական հանդէսից յետոյ սկսեց հրավառութիւն, դհուլ-գուռնան և ժողովրդական պարերը դարձեալ սկսեցին: Մինչև ժամը 11-ը դպրոցի բակում համաժողովրդական խանդավառ ու սրտալի խրախճան էր կատարուում: Օտարագրի հիւրերը մինչև վերջը մընացին:

Այսպէս Սալմաստն էլ իր ազգային պարտականութիւնը կատարեց դէպի Մեծ-Յօրեկանը: Մօտ 20 տարւայ ընթացքի մէջ, որ մենք այս գաւառումս ենք, յիրաւի, նոյեմբերի 21-ի տօնակատարութեան պէս բազմամարդ, երկարատև ու ժողովրդական շանթալից որևէ հանդիսակատարութիւն չենք տեսել: Մեծ-Տօնին Մեծ Մարդկանց— Սահակին և Մեսրոպին արժանի էլ մեծ ուրախութիւն արեց, իսկ եթէ եղանակը նպաստաւոր լինէր, հարկաւ, աւելի փառաւոր պիտի անցնէր և աւելի բազմամարդ կը լինէր:

Օտար գիւղացիները, աշակերտութիւնը և ուսուցչութիւնը Հաֆթվանում, ինչպէս որ պէտքն է, հիւրասիրելուց ու գիշերելուց յետոյ, առաւօտեան միևնոյն ձևով, դրօշակներով, դհուլ-գուռնայով վերադարձան իրենց գիւղերը:

Հանդէսի աջողութիւնը պարտական ենք տեսուչ պ. Գուլօեանին ուսուցիչների և Գործակ. Յորհրդի հետ միասին, որոնք աշխատանք չխնայեցին այդ բանի համար:

Սալմաստի ծխական խորհուրդների և ուսուցիչների խառը ժողովը վճռել է, որ յօգուտ Սալմաստի դպրոցական ֆոնդի մի հանգանակութիւն սկսել ամբողջ գաւառում: Արդէն հանգանակիչ մասնախումբը ընտրւած է և շուտով գործի է անցնելու:

Վ. Պատրիկեան